

## Jon taale kavin nyéga

*Kudi dé kulé mawulé tiyao naané kérae miték rasaakunoké*

<sup>1-3</sup> \*Naané Kudi wale yeyé yeyan du déké kudi las wakweké naanék. Dé Gotna kudi naanat dé wakwek. Wakwete dé Jisas Krai kulé mawulé tiyao, naané kérae apuba apuba miték rasaakunoké. Déknyényba Got képmáa kuttaknamaré yadéka dé dé rak. Naané déku kudi véknwutakne naané naana méni naanébu dérét vék. Vétakne naané déku sépéba naanébu kurék. Wani kulé mawulé tiyaakwa ban naanéké giyaadéka naané dérét vék. Vétakne naané déké gunat kudi wakweyo. Dé naané miték rasaakunoké kulé mawulé tiyaakwa ban déku yaapa wale re giyae, naanat kudi wakwedéka, naané véknwutakne naané gunat déké adél kudi wakweyo. Déku kudi véknwutakne dérét vétakne naané gunat wakweyo, guné naané wale nakurak mawulé yagunuké. Got bét déku nyaan Jisas Krai wale naané nakurak mawulé naané yo. Yanakwaké sanévéknwute guné wawo naané wale akwi nakurak mawulé yate raké naané yo. <sup>4</sup> Kéni kudi wuné kaviyu, yéknwun mawulé naana mawuléba sékérékduké.

*Yéknwun mawulé yate naané nyaakaba naané ro*

---

\* **1:1-3:** Jo 1:1-2, 4, 14

5 \*Gotna nyaan kényi kudi wakwedéka véknwutakne bulaa naané gunat wakweyo. Got kapéredi mu kaapuk yadé kwa. Yate dé gaankétéba kaapuk radé kwa. Yéknwun mu male dé yo. Yate dé nyaa vékwa pulak dé ro.

6 \*Naané kapéredi mawulé yate kapéredi mu yasaakunaran naané gaankétéba naané ro. Naané kapéredi mu yate kéga wamarék yaké naané yo, “Naané Got wale naané nakurak mawulé yo.” Waga wanaran naané yénaa naané yo. Adél kudi kaapuk wakwenakwa. Yate naané kaapuk miték ranakwa. 7 Naané Got yadé kwa pulak yéknwun mawulé yate yéknwun mu male yanaran naané miték naané ro. Nyaakaba naané ro. Rate naané Gotna du taakwa wale nakurak mawulé naané yo. Déku nyaan Jisas Kraís déknyényba kiyaadéka déku wény akwe dé yanan kapéredi mu yakutnyéputiyu. Yakutnyéputidéka naana mawulé yéknwun dé yo.

8 Naané kéga wamarék yaké naané yo, “Naané kapéredi mawulé kaapuk yanan.” Waga wanaran naané yénaa naané yo. Yanaka adél kudi wakwekwa ban Got naana mawuléba kaapuk tédé kwa. 9 Naané yanan kapéredi muké kélik yate Gorét kéga wanaran, “Naané kapéredi mawulé yate kapéredi mu naanébu yak.” Waga wanaran Got yanan kapéredi mu yakutnyéputiye naana kapéredi mawulé kutnébulké dé yo. Got waga yadéranké naané kutdéngek, dé adél kudi wakwete yéknwun mu male yadé kwa bege. 10 Got déknyényba dé wak, “Akwi du taakwa de kapéredi

---

\* 1:5: 1 Ti 6:16; Je 1:16-17      \* 1:6: 1 Jo 2:4

mawulé yate kapéredi mu de yo.” Naate wadénké naané kéga wanaran, “Naané kapéredi mu las kaapuk yanan.” Waga wanaran kényi kudi pulak naané wo, “Got yanan kapéredi muké wakwete yénaa dé yo. Got wan yénaa yakwa ban.” Wani kudi pulak naané wo. Waga wanaran Gotna kudi naana mawuléba kaapuk tédékwa.

## 2

### *Jisas Kraiss wan naanat Kutkalé Yakwa Ban*

<sup>1</sup>\*Guné wuna kudi véknwute wuna baadi pulak guné ro. Gunéké wuné kényi kudi kaviyu, guné kapéredi mu yamarék yagunuké. Guné las kapéredi mu yagunéran naana saknwuba tékwa ban Jisas Kraiss gunat kutkalé yate naana yaapa Gorét waataké dé yo gunéké. Dé Gotna kudi véknwute yéknwun mu male dé yo. <sup>2</sup>\*Got dé du taakwa yadakwa kapéredi muké rékaréka yo. Yadéka déknyényba Jisas Kraiss yadan kapéredi muké dé kiyaak, Got akwi du taakwana kapéredi mawulé, naana kapéredi mawulé wawo kutnébulte, naanat rékaréka yamarék yaduké.

<sup>3</sup> Got yaga pulak dé? Naané déku kudi miték véknwute wakwedén pulak yanaran naané déké miték kutdénké naané yo. Wan adél.

<sup>4</sup>\*Guné las Gotna kudi miték véknwumarék yate kéga wagunéran, “Naané Gotké naanébu miték kutdénké.” Waga wagunéran yénaa guné yo. Adél kudi guna mawuléba kaapuk tékwa. <sup>5</sup>\*Guné

---

\* **2:1:** Yi 9:24      \* **2:2:** Jo 1:29, 11:52; Ro 3:25      \* **2:4:** 1 Jo 1:6,

8      \* **2:5:** Jo 14:21-23; 1 Jo 4:12, 17, 5:3

las Gotna kudi miték véknwute wakwedén pulak yagunéran guné déké guné mawulat kapére yo. Wan adél. Naané Got wale nakurak mawulé naané yo, kapu kaapuk? Yaga pulak kutdéngké naané yo? <sup>6</sup> \*Kéga yanaran naané kutdéngké naané yo. Naané kéga wanaran, “Naané Got wale nakurak mawulé naané yo.” Waga wanaran naané, Jisas Krai keni kápmaaba rate yéknwun mu male yadén pulak, yéknwun mu male yate raké naané yo. Waga ranaran Got wale nakurak mawulé yanakwaké kutdéngké naané yo.

*Naané déké mawulat kapére yate nyaakaba naané ro*

<sup>7</sup> \*Mawulat kapére yawurékwa du taakwa, mé véknwu. Kaviwurékwa kudi wan kulé kudi kaapuk. Déknyényba guné batnyé Jisana jébaaba yaale guné wani kudi véknwuk. Naané wani kudi gunat wanaka guné véknwuk. <sup>8</sup> \*Kaviwurékwa kudi wan kulé kudi pulak. Mé véknwu. Guné du taakwaké mawulat kapére yaké guné yo. Jisas Krai déké mawulat kapére yadéka guné wawo déké mawulat kapére yagunéka de nak du taakwa véte wani kudiké de kutdéngék. Naané déké mawulat kapére yanakwa wan gaankété yédéka yé tékdéka nyaa yaaladéka pulak. Jisas Krai débu yaak. Yae dé nyaa pulak dé ro. Nyaa yaaladéka du taakwa miték véte yéknwun mawulé yate miték radakwa pulak, Jisas Krai yae naanat kutkalé yadéka naané yéknwun mawulé yate

---

\* **2:6:** Jo 13:15    \* **2:7:** 2 Jo 1:5-6    \* **2:8:** Jo 1:9; Ro 13:12

miték ro. Gaankétéba kaapuk ranakwa. Nyaakaba naané ro.

<sup>9</sup> \*Jisasna jébaaba yaalan du taakwa déku jébaaba yaalan nak du taakwaké mawulé yamarék yadaran de gaankétéba rakwa du pulak de wekna ro. De kéga wamarék yaké de yo, “Naané yéknwun mawulé yate nyaakaba naané ro.” Waga wadaran yénaa kudi de wakweyo. <sup>10</sup> \*Jisasna jébaaba yaalan du taakwa déku jébaaba yaalan nak du taakwaké mawulat kapére yadaran de nyaakaba rakwa du pulak de miték ro. De yéknwun mawulé de yo. Kapéredi mu yamarék yaké de yo. <sup>11</sup> \*Jisasna jébaaba yaalan du taakwa déku jébaaba yaalan nak du taakwaké mawulé yamarék yadaran de kapéredi mawulé yo. Yate kaapuk miték radakwa. Gaankétéba de ro. Rate méni kiyaan du pulak de ro. Rate Gotké yénakwa yaabuké kaapuk kutdéndan.

<sup>12</sup> \*Makwal baadi pulak rakwa du taakwa, Jisas Krai kiyaadék Got yagunén kapéredi mu débu yatnyéputik. Yatnyéputidéka gunéke wuné kaviyu.

<sup>13</sup> Guné gwalepa du, guné kutdéngék, Got kápmaa kuttaknakaapuk yadén tulé ran banét. Kutdénggunéka gunéke wuné kaviyu.

Guné nébikara du, Jisas Krai gunéke kwayédén apa Setenna apat débu talaknak. Talaknadéka gunéke wuné kaviyu.

Guné baadi, naana yaapa Gorét guné

---

\* **2:9:** 1 Jo 3:10, 15, 4:20      \* **2:10:** Ro 14:13      \* **2:11:** Jo 12:35

\* **2:12:** 1 Ko 6:11

kutdéngék. Kutdénggunéka gunéké wuné kaviyu.

<sup>14</sup> Guné gwalepa du, guné kutdéngék, Got kápmaa kuttaknakaapuk yadén tulé ran banét. Kutdénggunéka gunéké wuné kaviyu.

Guné nébikara du, Gotna kudi guna mawuléba rasaakudéka guné wup yakaapuk yate apat kapére yagunéka guna apa Setenna apat débu talaknak. Talaknadéka gunéké wuné kaviyu.

*Kéni kápmaana kapéredi muké mawulé yamarék yaké naané yo*

<sup>15</sup> \*Kéni kápmaaba rate kapéredi mu yakwa du taakwa kéni kápmaana kapéredi muké de mawulat kapére yo. Yadakwa pulak, guné yamarék yaké guné yo. Guné wani muké mawulat kapére yagunéran, guné naana yaapa Gotké mawulat kapére yamarék yaké guné yo. <sup>16</sup> Kéni kápmaaba rate kapéredi mu yakwa du taakwa kéga de yo. Kapéredi mawulé yate kapéredi mu yaké mawulé yadakwa, nak duna gwalmu véte wani gwalmu kéraaké géndakwa, deku gwalmuké sanévéknwute deku yéba kevérekdwakwa, waga yate de kapéredi mu yo. Yate kapéredi mawulé yakwa du taakwana kudi de véknwu. Gotna kudi kaapuk véknwudakwa. <sup>17</sup> \*Kéni kápmaa, kéni kápmaana kapéredi mu, du taakwana kapéredi mawulé wawo bari kaapuk yaké dé yo. Gotna

---

\* **2:15:** Ro 8:7; Je 4:4      \* **2:17:** Mt 7:21

kudi vénwukwa du taakwa rasaakuké de yo apuba apuba.

*Jisas Kraisna maama debu yaak*

<sup>18</sup> \*Wuna baadi pulak rakwa du taakwa, mé véknwu. Kéni kápmaa kaapuk yaran tulé bari yaaké dé yo. Guna du gunat wakwedaka kudi gunébu véknwuk, Jisas Kraisna Maama yaadu kéni kápmaa kaapuk yadéranké. Bulaa déku wupmalemu maama debu yaak. Yaadaka naané kutdégék. Kéni kápmaa kaapuk yaran tulé bari yaaké dé yo. <sup>19</sup> \*Wani du Jisas Kraisna maama taale naané wale de rak. Rate naané wale nakurak mawulé kaapuk yadan. Yate de naana jébaa kulaknyénytakne de yék. De naané wale nakurak mawulé yado mukatik de naané wale rakatik de yak. De naanat kulaknyénytakne yédaka naané kutdégék. Naané wale nakurak mawulé kaapuk yadan.

<sup>20</sup> Guné yadan pulak kaapuk yagunékwa. Gunéké Jisas Krais dé Gotna Yaamabi débu kwayék. Kwayédéka wulae guna mawuléba dé tu. Tédéka guné adél kudiké guné kutdégék.

<sup>21</sup> Guné adél kudiké kutdégmarék yate guné adél kudiké kutdéggunuké, wuné kéni nyéga kaapuk kawiwurékwa. Guné adél kudiké kutdéggunéka wuné kéni nyéga gunéké wuné kaviyu. Guné kudi véknwute guné kutdégék. Samu kudi adél kudi? Samu kudi yénaa kudi? Kutdéggunéka wuné kéni nyéga kaviyu.

<sup>22</sup> \*Yénaa kudi wakwekwa du wan kiyadé?

\* **2:18:** Mt 24:5, 24; 2 Jo 1:7  
10:32-33; 1 Jo 4:3; 2 Jo 1:7

\* **2:19:** Ap 20:30

\* **2:22:** Mt

Yénaa kudi wakwekwa du kéga de wo, “Jisas wan Got wadén ban Kraisa kaapuk.” Waga wate de Jisas Kraisa maama de ro. Rate de Got déku nyaan waleké kuk kwayu. <sup>23</sup> \*Du taakwa Gotna nyaan Jisaské kuk kwayédaran, déku yaapa Gotké wawo kuk kwayédo Got deku mawuléba témarék yaké dé yo. Du taakwa kéga wadanan, “Jisas wan naanat kutkalé yaduké Got wadén ban Kraisa.” Waga wadanan Jisasna yaapa deku mawuléba téké dé yo.

*Gotna Yaamabi adél kudiké dé naanat yakwatnyu*

<sup>24</sup> Gunat wuné wakweyo. Jisasna jébaaba batnyé yaale véknwugunén kudi guna mawuléba tésaakuké dé yo. Waga wuné mawulé yo. Tésaakudu guné Got bét déku nyaan wale nakurak mawulé yate rasaakuké guné yo. <sup>25</sup> \*Gotna nyaan Jisas Kraisa dé kapmu dé naanat wak, “Wuné kulé mawulé kwayéké wuné yo, guné kérae apuba apuba miték rasaakugunuké. Wan adél.” Naate dé naanat wak.

<sup>26</sup> Yénaa kudi wakwekwa du las guna yéknwun mawulé yaalébaanké de mawulé yo. Gunéké wuné wani kudi kaviyu, guné déké kutdénngunuké. <sup>27</sup> \*Gunéké Jisas Kraisa dé Gotna Yaamabi débu kwayék. Kwayédék wulae guna mawuléba dé tu. Nak du adél kudiké kutdénngunuké, gunat yakwatnyémarék yaké dé yo. Gotna Yaamabi guna mawuléba tésaakute dé kapmu akwi kudiké gunat yakwatnyu. Adél kudi

\* 2:23: Mt 10:32-33; Jo 5:23; 2 Jo 1:9      \* 2:25: Jo 3:15, 6:40

\* 2:27: Jo 14:26

dé wakweyo. Yénaa kudi kaapuk. Guné déku kudi miték mé véknwu. Véknwute Jisas Kraiis wale nakurak mawulé yate raké guné yo.

<sup>28</sup>\*Wuna baadi pulak rakwa du taakwa, guné Jisas Kraiis wale nakurak mawulé yate raké guné yo. Waga ragunéran kényi kápmaat gwaamale yaadéran tulé dérét véte naané wup yamarék yaké naané yo. Yate naané nyékéri yamarék yate déké paakumarék yaké naané yo. <sup>29</sup>\*Guné kutdéngek. Jisas Kraiis Gotna kudi véknwute yéknwun mu male dé yo. Waga kutdéngte kéga wawo kutdéngeké guné yo. Gotna kudi véknwute yéknwun mu yakwa du taakwa de Gotna baadi de ro.

### 3

#### *Bulaa naané Gotna baadi naané ro*

<sup>1</sup>\*Kényi yéknwun kudi mé véknwu. Naana yaapa Got dé naané ké mawulat kapére yo. Yate naanat débu wak, “Guné wuna baadi guné ro.” Naate wadéka naané déku baadi naané ro. Wan adél. Kényi kápmaaba rate kapéredi mu yakwa du taakwa Gotké miték kutdénngmarék yate naané ké wawo kaapuk kutdénngdan.

<sup>2</sup>\*Mawulat kapére yawurékwa du taakwa guné mé véknwu. Bulaa naané Gotna baadi naané ro. Kaapuk kutdénngnan. Kukba yaga pulak raké naané yo? Kéga male naané kutdéngek. Jisas Kraiis gwaamale yaadu naané dérét véte déké miték kutdénngte naané dé pulak raké naané

\* 2:28: 1 Jo 4:17      \* 2:29: 1 Jo 3:10      \* 3:1: Jo 1:12-13, 16:3

\* 3:2: 2 Ko 3:18

yo. <sup>3</sup> Naané dé pulak ranaranké sanévénwute, naané kapéredi mawulé yamarék yaké naané yo. Dé yadékwá pulak, yéknwun mawulé male yaké naané yo.

<sup>4</sup> Kapéredi mu yakwa du taakwa Gotna apa kudi kaapuk véknwudakwa. Yate de Gotké kuk kwayu. <sup>5</sup> \*Guné Jisas Kraiské guné kutdengék. Dé du taakwana kapéredi mu kutnébulké nae dé giyaak. Dé kapéredi mawulé kaapuk yadékwá. Dé yéknwun mawulé male dé yo. <sup>6</sup> \*Dé wale nakurak mawulé yakwa du taakwa kapéredi mu kaapuk yadakwa. Kapéredi mu yasaakukwa du taakwa kwatkwa de ro. Déké kaapuk miték kutdengdan.

<sup>7</sup> \*Wuna baadi pulak rakwa du taakwa, guné jéráwu yaké guné yo. De gunat yénaa taknamaréék yaké de yo. Mé véknwu. Jisas Krai wan Gotna kudi véknwute yéknwun mu yakwa ban. Gotna kudi véknwute yéknwun mu yakwa du taakwa, de Jisas Krai rakwa pulak, Gotna méniba miték ro. Got kápmaa kuttaknadén tulé Seten dé kapéredi mu yak. <sup>8</sup> \*Bulaa wawo dé kapéredi mu yasaaku. Yadéka kapéredi mu yasaakukwa du taakwa wan Setenna du taakwa de ro. Setenna jébaa yaalébaanké nae dé Gotna nyaan Jisas kényi kápmaat giyaak.

<sup>9</sup> \*Gotna baadi kapéredi mu kaapuk yasaakudakwa, déké kulé mawulé kwayédén bege. Kulé mawulé Gotna mawulé pulak kérae de kapéredi mawulé yamarék yate kapéredi mu kaapuk

---

\* **3:5:** 2 Ko 5:21; 1 Pi 2:22-24      \* **3:6:** Ro 6:1-2, 14      \* **3:7:** 1 Jo 2:29      \* **3:8:** Jo 8:44      \* **3:9:** 1 Jo 5:18

yasaakudakwa, Got deku yaapa radékwa bege. <sup>10</sup> Yaga pulak kutdénké naané yo, du taakwaké? Wan Gotna baadi de, kapu Setenna baadi de? Kéga véte kutdénké naané yo. Gotna kudi véknwumarék yate yéknwun mu yamarék yakwa du taakwa wan Setenna baadi de. Jisasna jébaaba yaalan nak du taakwaké mawulat kapére yamarék yakwa du taakwa wan Setenna baadi de. Gotna kudi véknwute yéknwun mu yakwa du taakwa wan Gotna baadi de. Jisasna jébaaba yaalan nak du taakwaké mawulat kapére yakwa du taakwa wan Gotna baadi de.

*Naané déké mawulat kapére yaké naané yo*

<sup>11</sup> \*Kéni kudi mé véknwu. Naané nak du taakwaké mawulat kapére yaké naané yo. Wani kudi déknyényba Jisasna jébaaba batnyé yaale guné véknwuk. <sup>12</sup> \*Naané wani kudi véknwutakne naané Adamna nyaan Ken yadén pulak yamarék yaké naané yo. Dé déku wayéknat dé viyaapéreknék. Setenna du rate dé waga yak. Kapéredi mawulé yate dé wupmalemu kapéredi mu yak. Déku wayékna yéknwun mawulé yate yéknwun mu yadéka Ken kélík yate dé dérét viyaapéreknék. <sup>13</sup> \*Guné Jisasna jébaaba yaalan du taakwa, kéni kékmaaba rate kapéredi mu yakwa du taakwa, Ken déku wayéknaké kélík yadén pulak, gunéké kélík yadaran guné kwagénmarék yaké guné yo. <sup>14</sup> \*Naané Jisasna jébaaba yaalan nak du taakwaké mawulat kapére

---

\* **3:11:** Jo 13:34-35      \* **3:12:** Jen 4:8      \* **3:13:** Mt 5:11-12; Jo 15:18-19      \* **3:14:** 1 Jo 2:11

yate naané kutdégék. Naané kulé mawulé naanébu kéraak. Kérae Got wale apuba apuba miték rasaakuké naané yo. Kapéredi taalát yémarék yaké naané yo. Waga naané kutdégék. Jisasna jébaaba yaalan nak du taakwaké mawulat kapére yamarék yakwa du taakwa, de kapéredi taalát yédakwa yaabuba de yu. <sup>15</sup>\*Jisasna jébaaba yaalan nak du taakwaké mawulat kapére yamarék yakwa du taakwa, deku mawulé wan dut viyaapéreknén duna mawulé pulak dé tu. Guné kutdégék. Dut viyaapéreknén du Gotké yénakwa yaabuba kaapuk yédakwa. <sup>16</sup>\*Jisas Kraais dé naanéké mawulat kapére yate dé naanéké kiyaak. Kiyaadékné sanévéknwute naané du taakwaké mawulat kapére yadékwaké naané kutdégék. Kutdégte, dé yadén pulak, naané Jisasna jébaaba yaalan nak du taakwaké mawulat kapére yaké naané yo. Yate derét kutkalé yaké naané yo. Derét kutkalé yate kiyaanaran wan yéknwun.

<sup>17</sup> Gwalmumama du taakwa Jisasna jébaaba yaale Jisasna jébaaba yaalan gwalmu yamarék du taakwat véte, de derét kutkalé yamarék yadaran wani gwalmumama du taakwa yaga pulak waké de yo, “Naané Gotké naané mawulat kapére yo?” Waga wamarék yaké de yo, gwalmu yamarék yakwa du taakwaké mawulat kapére yamarék yadakwa bege.

<sup>18</sup>\*Guné, wuna makwal baadi pulak rakwa du taakwa, mé véknwu. Naané du taakwaké mawulat kapére yaké naané yo. Yate naané

---

\* **3:15:** Mt 5:21-22      \* **3:16:** Jo 13:1; 1 Te 2:8      \* **3:18:** Je 2:15-16

yaamabi kudi bulkaapuk yate derét kutkalé yaké naané yo.

*Naané Jisas Kraiské miték sanévéknwute wup yamarék yate Gotna méniba téké naané yo*

<sup>19</sup> Kéga naané kutdénké naané yo. Got adél kudi wakwedéka naané déku du taakwa naané ro. Rate naané déku méniba téte, wup yamarék yate, yéknwun mawulé yaké naané yo. <sup>20</sup> Naana mawuléba sanévéknwute, yanan kapéredi muké kélik yate, kéga wanaran, “Naané kapéredi mu yakwa du taakwa.” Waga wanaran naané wup yamarék yaké naané yo, Got némaan ban rate naana mawuléké kutdénkte naanéké mawulé lékdékwa bege. Got dé akwi muké dé kutdénké.

<sup>21</sup> Mawulat kapére yawurékwa du taakwa, guné mé véknwu. Naana mawuléba sanévéknwute naané kéga wanaran, “Kapéredi mu kaapuk yanan.” Waga wanaran naané Gotna méniba téte, wup yamarék yate, yéknwun mawulé yaké naané yo. <sup>22</sup> \*Yate dérét waatano dé mawulé yanaran akwi jébaa yatiyaaké dé yo, déku kudi miték véknwute mawulé yadékwa jébaa yanakwa bege. <sup>23</sup> \*Got kéga dé naanat wak, “Guné guna mawuléba waké guné yo, ‘Jisas Krai wan Gotna nyaan. Dé naanat kutkalé yaké dé yo. Wan adél.’ Naate wate guné du taakwaké mawulat kapére yaké guné yo.” Waga dé Got naanat wak. <sup>24</sup> \*Gotna kudi miték véknwukwa du taakwa de Got wale nakurak mawulé yate ro. Got déku Yaamabi débu tiyaak naanéké. Tiyaadéka dé

---

\* **3:22:** Mt 21:22      \* **3:23:** Jo 6:29, 13:34      \* **3:24:** Ro 8:9

naana mawuléba wulae tédéka naané kutdénké.  
Got dé naana mawuléba tu.

## 4

*Gotna Yaamabi deku mawuléba dé tu kapu kaapuk?*

<sup>1</sup> \*Mawulat kapére yawurékwa du taakwa, guné mé véknwu. Du taakwa gunéké yae wadaran, “Gotna Yaamabi naana mawuléba wulae tédéka naané Gotna yéba kudi wakweyo.” Waga wadaran guné deku kudi bari véknwumarék yaké guné yo, Gotna yéba kudi wakwete yénaa kudi wakwekwa wupmalemu du taakwa gege gayéba radakwa bege. Taale deku kudiké sanévéknwuké guné yo. Sanévéknwute deku jébaa véké guné yo. Vétakne kutdénké guné yo. Gotna Yaamabi deku mawuléba dé tu, kapu kutakwa deku mawuléba lé tu? <sup>2</sup> \*Gotna Yaamabi du taakwana mawuléba tédéran de waké de yo, “Got wadéka déku nyaan Jisas Krai kápmaaba rakwa duna sépé kure dé naana kápmaat giyaak. Wan adél.” Waga wado guné kutdénké guné yo. Gotna Yaamabi deku mawuléba dé tu. <sup>3</sup> \*De kéga wadaran, “Kaapuk. Got Jisasnyét kaapuk wadén. Gotna nyaan naana kápmaat kaapuk giyaadén.” Waga wadaran guné kutdénké guné yo. Gotna Yaamabi deku mawuléba kaapuk tédékwa. Wani kudi wakwekwa du taakwa Jisas Kraisna maama wakwedékwa kudi de véknwu. Déknyényba guné kudi véknwuk, Jisas Kraisna maama yaadéranké. Bulaa yae dé keni kápmaaba ro.

\* 4:1: Mt 24:11      \* 4:2: 1 Ko 12:3      \* 4:3: 2 Jo 1:7

<sup>4</sup> Wuna makwal baadi pulak rakwa du taakwa, mé véknwu. Guné Gotna du taakwa guné. Gotna Yaamabi guna mawuléba dé tu. Seten apa yate dé kényi kápmaaba rate kapéredi mu yakwa du taakwana mawuléba dé tu. Gotna Yaamabi apat kapére yate Setenét débu talaknak. Talaknadéka guné Gotna du taakwa, guné yénaa kudi wakwekwa Setenna du taakwat gunébu wak, de yédoké. <sup>5</sup> \*Yénaa kudi wakwekwa du taakwa Gotké kaapuk kutdéndan. Yate de kényi kápmaana muké male de kudi wakweyo. Wakwedaka de kényi kápmaaba rate kapéredi mu yakwa du taakwa de deku kudi véknwu. <sup>6</sup> \*Naané Gotna du taakwa naané ro. Gotké kutdénkwa du taakwa de naana kudi véknwu. Nak du taakwa Gotna du taakwa ramarék yate de naana kudi kaapuk véknwudakwa. Yadaka naané kéga kutdéngék. Naana kudi véknwukwa du taakwa wan deku mawuléba Gotna Yaamabi dé adél kudi wakwete dé tu. Naana kudi véknwumarék yakwa du taakwa wan deku mawuléba Seten dé yénaa kudi wakwete dé tu.

*Got wan naanéké mawulat kapére yasaakukwa ban*

<sup>7</sup> Mawulat kapére yawurékwa du taakwa, guné mé véknwu. Got naanéké mawulat kapére yate dé naanat wo, naané nak du taakwaké mawulat kapére yanoké. Wadékwaké sanévéknwute naané nak du taakwaké mawulat kapére yaké naané yo. Waga wuné mawulé yo. Nak du taakwaké mawulat kapére yakwa du taakwa de Gorét

\* **4:5:** Jo 15:19      \* **4:6:** Jo 8:47

miték kutdéngek. Kutdénge Gotna baadi de ro.  
 8 Got wan naanéké mawulat kapére yasaakukwa ban. Dé waga yadéka nak du taakwaké mawulat kapére yamarék yakwa du taakwa Gotké kaapuk kutdénge dan. 9 \*Got naanéké mawulat kapére yate déku nyaanét wadéka dé kényi kékmaat giyaak. Gotna nyaan wan nakurak male. Dé giyaak, kiyae naana kapéredi mawulé kutnébuldu naané kulé mawulé kérae apuba apuba miték rasaakunoké. Got déku nyaanét waga wadéka naané kutdéngek, naanéké mawulat kapére yadékwaké. 10 \*Samu paatéké wuné wakweyo? Naané Gotké mawulat kapére yanakwaké wuné wakweyo, kapu Got naanéké mawulat kapére yadékwaké wuné wakweyo? Wan Got dé naanéké mawulat kapére yo. Wani muké wuné wakweyo. Dé naanéké mawulat kapére yate déku nyaanét wadéka dé giyaak, kiyae naana kapéredi mawulé yatnyéputiké.

11 \*Mawulat kapére yawurékwa du taakwa, guné mé véknwu. Got dé naanéké waga mawulat kapére yo. Yadékwaké naané akwi du taakwaké mawulat kapére yanaran wan yéknwun. 12 \*Du taakwa Gorét kaapuk védakwa. Yado naané du taakwaké mawulat kapére yanaran Got dé naana mawuléba téké dé yo. Tédu naané dérét vé pulak yate dérét miték kutdéngeké naané yo. Kutdénge naané déké mawulat kapére yate kutdéngeké naané yo, dé naanéké mawulat kapére yadékwaké. Wan adél.

---

\* 4:9: Jo 3:16    \* 4:10: Ro 5:8-10    \* 4:11: Mt 18:33    \* 4:12: Jo 1:18

13 \*Got déku Yaamabi débu tiyaak naanéké. Tiyaadéka dé naana mawuléba wulae tédéka naané kutdéngek. Naané Got wale naané nakurak mawulé yate ro. 14 \*Got déku nyaanét dé wak, dé giyae akwi du taakwat Setenna taababa kéraaduké. Wadéka giyaadéka naanébu vék. Vétakne naané kudi wakweyo. 15 Du taakwa kéga wadaran, “Jisas wan Gotna nyaan. Wan adél.” Waga waran du taakwa mawuléba Got dé tu. Tédéka de dé wale nakurak mawulé yate ro. 16 \*Got naana mawuléba tédéka naané kutdéngek, dé naanéké mawulat kapére yadékwaké. Kutdénge naané naana mawuléba wo, “Got naanéké dé mawulat kapére yo. Wan adél.” Naate naané wo.

Got wan naanéké mawulat kapére yasaakukwa ban. Akwi du taakwaké, Gotké wawo, mawulat kapére yasaakukwa du taakwa Got wale de nakurak mawulé yo. Yadaka dé deku mawuléba dé tu. 17 Naané kutdéngek. Got naanéké dé mawulat kapére yo. Yate naané nak du taakwaké mawulat kapére yanoké dé mawulé yo. Naané waga yate, dé apakélé kot véknwukwa némaan ban rate akwi du taakwa yan muké kudi wakwedéran nyaa, wup yamarék yaké naané yo, Jisas Gotké wup yamarék yadéka naané Jisas wale nakurak mawulé yate ranakwa bege. 18 Got naanéké mawulat kapére yadékwaké kutdénge naané wup yamarék yaké naané yo. Got déké mawulat kapére yadékwaké kutdéngekwa du taakwa de akwi muké wup yamarék yaké de yo. Nak du taakwa

---

\* 4:13: 2 Ko 1:21-22      \* 4:14: Jo 3:17      \* 4:16: Jo 6:69

wup yate kéga de wo, “Got yanan kapéredi mu yakataké dé yo.” Waga wate Got deké mawulat kapére yadékwaké kaapuk kutdéndan. Kutdénmarék yate de wup yo.

<sup>19</sup> \*Taale Got dé naanéké mawulat kapére yak. Yadéka naané deké mawulat kapére yo. <sup>20</sup> Du taakwa Jisasna jébaaba yaalan nak du taakwaké mawulat kapére yamarék yate kéga wadaran, “Naané Gotké naané mawulat kapére yo.” Waga wadaran wan yénaa kudi wakwekwa du taakwa de. De wani du taakwat debu vék. Vétakne deké kaapuk mawulat kapére yadakwa. De Gorét vémarék yate, yaga pulak de déké mawulat kapére yaké de yo? Wan kaapuk. Gotké mawulat kapére yaké yapatiké de yo. De védakwa du taakwaké mawulat kapére yamarék yate, vémarék yadakwa ban Gotké mawulat kapére yaké yapatiké de yo. <sup>21</sup> \*Jisas kényi kud débu naanat wak, “Gunat wuné wakweyo. Guné wunéké mawulat kapére yate wuna jébaaba yaalan nak du taakwaké wawo mawulat kapére yaké guné yo.” Naate dé naanat wak.

## 5

*Jisaské miték sanévéknwukwa du taakwa kapéredi muké debu kuk kwayék*

<sup>1</sup> Du taakwa deku mawuléba wadaran, “Jisas wan Got wadén ban Krai. Wan adél.” Waga wadaran Got deku yaapa radéka de déku baadi de ro. De deku yaapa Gotké mawulat kapére

---

\* **4:19:** 1 Jo 4:10      \* **4:21:** Mt 5:44-45; Mk 12:29-31

yadaran de déku baadiké wawo mawulat kapére yaké de yo. <sup>2</sup> Naané Gotké mawulat kapére yate déku kudi véknwunaran naané kutdengké naané yo. Déku baadiké wawo naané mawulat kapére yo. <sup>3</sup> \*Naané Gotké mawulat kapére yanaran naané déku kudi miték véknwute wakwedén pulak yaké naané yo. Wan adél. Wakwedén pulak yate yéknwun mawulé yate miték raké naané yo. <sup>4</sup> \*Naané Gotna baadi kéga wanaran, “Jisas wan Got wadén ban Kraiss. Wan adél.” Naate wanaran dé Got naanat kutkalé yaké dé yo. Yate naanéké apa tiyaadu naané keni kékpaaba rakwa kapéredi muké kuk kwayétakne yéknwun mu male yaké naané yo. Yate Got wakwedékwa pulak yate yéknwun mawulé yate, miték rasaakuké naané yo. <sup>5</sup> \*Jisasna jébaaba yaalan du taakwa déké miték sanévéknwute de wo, “Dé Gotna nyaan dé. Wan adél.” Naate wakwa du taakwa de keni kékpaaba rakwa kapéredi muké kuk kwayétakne de yéknwun mawulé yate miték rasaaku.

*Got dé kudi wakwek déku nyaanké*

<sup>6</sup> \*Wan Jisas Kraiss dé giyaak naana kékpaat. Giyaadéka dé Jon Gotna yéba dérét gu yaakutaknak. Kukba Jisas miba kiyaadéka déku wény dé akuk. Jon dérét Gotna yéba gu yaakutaknaduké male dé Jisas keni kékpaat giyaak, kapu kaapuk? Wan kaapuk. Jon dérét Gotna yéba gu yaakutaknadu kukba kiyaadu déku wény akuduké dé giyaak. Gotna Yaamabi Jisaské wani kudi dé

---

\* **5:3:** Mt 11:30; Jo 14:15, 23-24      \* **5:4:** Jo 16:33      \* **5:5:** Ro 8:37      \* **5:6:** Jo 1:29-34

wakweyo. Dé adél kudi dé wakweyo. Wakwedéka naané kutdégék. Jisas Kraiss Gotna nyaan waga dé yak. <sup>7-8</sup> \*Naané Gotna Yaamabina kudi véknwute, Jon Jisasnyét Gotna yéba yaakutaknan gu, Jisasna wényét wawo vétakne naané wani mu kupukgé sanévéknwute naané kényi nakurak kudiké kutdégék. Jisas Kraiss wan Gotna nyaan. Waga naané kutdégék. <sup>9</sup> \*Du taakwa kéga wadaran, “Wan adél kudi naané wakweyo.” Waga wadaran naané deku kudi véknwuké naané yo. Got dé adél kudi male wakweyo. Déku kudi deku kudit dé talaknak. Deku kudi véknwunaran Got déku nyaan Jisaské wakwedén kudi miték véknwuké naané yo. <sup>10</sup> \*Du taakwa Jisaské miték sanévéknwudaran Gotna kudi deku mawuléba tédu de kutdégké de yo. Jisas wan déku nyaan. Du taakwa Gotna kudi miték véknwumarék yadaran de déku nyaan Jisaské wakwedén kudi véknwumarék yaké de yo. Yate kényi kudi pulak de deku mawuléba wo, “Jisas wan Gotna nyaan kaapuk. Got waga wakwete yénaa kudi dé wo. Got wan yénaa yakwa ban.” Wani kudi pulak de wo. Got dé naanat kudi débu wakwek déku nyaanké. <sup>11</sup> Kéga dé wak, “Wuna nyaanét wawuréka dé giyaak. Giyae dé gunéké kulé mawulé débu kwayék, guné apuba apuba miték rasaakugunuké.” Waga dé Got naanat wak. <sup>12</sup> \*Gotna nyaan wale nakurak mawulé yakwa du taakwa de kulé mawulé debu kéraak. Kérae apuba apuba miték rasaakuké de yo. Gotna

---

\* **5:7-8:** Jo 15:26      \* **5:9:** Jo 5:32-37, 8:18      \* **5:10:** Ga 4:6  
 \* **5:12:** Jo 3:36

nyaan wale nakurak mawulé yamarék yakwa du taakwa kulé mawulé kéraamarék yate, apuba apuba miték rasaakumarék yaké de yo.

*Kulé mawulé kérae miték rasaakunranké kutdénké naané yo*

<sup>13</sup> \*Jisaské guné miték sanévéknwu. Sanévéknwute guné kéga wo, “Jisas wan Gotna nyaan. Dé naanat kutkalé yaké dé yo. Wan adél.” Naate guné wo. Gunéké wuné kényéga kaviyu. Guné kulé mawulé kérae apuba apuba miték rasaakugunéranké kutdénngunuké, wuné kényéga kaviyu. <sup>14</sup> \*Naané miték kutdénké. Naané Gotna kudi véknwute mawulé yadékwá pulak yate dérét waatanaran naana kudi véknwuké dé yo. Waga kutdénge déké wup yamarék yate yéknwun mawulé yaké naané yo. Dé naana kudi véknwuké dé yo. <sup>15</sup> Véknwute yaduké waatanakwa pulak, naanat kutkalé yaké dé yo. Waga wawo naané kutdénké.

<sup>16-17</sup> \*Du taakwa kapéredi mawulé yadaran de yéknwun mu kaapuk yadakwa. Kapéredi mu de yo. Waga naané kutdénké. Gunat wuné wakweyo. Jisasna jébaaba yaalan du taakwa kapéredi mawulé yadaran Jisasna jébaaba yaalan nak du taakwa yadan kapéredi mawulat vétakne Gorét waataké de yo, kapéredi mawulé yan du taakwaké. Waatado dé Got kulé mawulé kwayéké dé yo, de miték rasaakudoké. Du taakwa las de nak pulak kapéredi mawulé de yo. De Jisaské kuk kwayu. Kwayédaka deku mawulé kapéredi dé

---

\* **5:13:** Jo 20:31    \* **5:14:** Jo 14:13    \* **5:16-17:** Mt 12:31

yak. De wani kapéredi mawulé yate de kapéredi taalat yédakwa yaabuba yu. Wuné kapéredi mu yakwa du taakwaké wakwete wuné Jisaské kuk kwayékwa du taakwaké kaapuk wakwewurén. Jisasna jébaaba yaalan du taakwa deké Gorét waatadoké, wuné kaapuk wakwewurén.

<sup>18</sup> \*Gotna baadi déku méniba de ro. Radaka dé deké miték vu. Védéka kapéredi mu yasaakukwa ban Seten derét yaalébaanké dé yapatiyu. Yadéka naané kutdégék. Gotna baadi kapéredi mu kaapuk yasaakudakwa.

<sup>19</sup> Naané kutdégék. Naané Gotna baadi naané ro. Seten kéné kápmaaba rate kapéredi mu yakwa du taakwaké dé némaan ban ro.

<sup>20</sup> \*Naané kutdégék. Gotna nyaan Jisas débu giyaak. Giyae dé naanéké yéknwun mawulé débu tiyaak, naané Gotké miték kutdégngoké. Dé kapmu naana némaan ban Got dé ro. Nak némaan ban dé pulak kaapuk radékwa. Naané déku nyaan Jisas Kraiss wale nakurak mawulé yate naané dé wale nakurak mawulé yate ro. Wan némaan ban Got dé ro. Dé kapmu dé naanéké kulé mawulé tiyao, naané apuba apuba miték rasaakunoké.

<sup>21</sup> \*Wuna makwal baadi pulak rakwa du taakwa, gunat wuné wakweyo. Guné yénaa gotké kuk kwayéké guné yo.

Wani wuné wakwebutik.

---

\* **5:18:** Jo 17:15      \* **5:20:** Jo 17:3      \* **5:21:** 1 Ko 10:14

**Gotna Kudi**  
**The New Testament in the Maprik dialect of the**  
**Ambulas Language**  
**Nupela Testamen long tokples Maprik long Niugini**  
copyright © 1983 Wycliffe Bible Translators, Inc.

Language: Ambulas (Maprik) (Ambulas)

Dialect: Maprik

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-04

---

PDF generated using Haiola and XeLaTeX on 23 Aug 2023 from source files dated 9 Oct 2020

b436d84b-26dc-54d0-bff0-26a2d25c90de